

// Tin tempo pa sembra y tin tempo pa cosecha,
pero prome cu por sembra mester bruha e tera prome.



Ursell Arends
Candidato Nr. 1



Tai-Foo Lee
Candidato Nr. 2



Liliana Braamskamp-Erasmus
Candidato Nr. 3



Raymond Kamperveen
Candidato Nr. 4



Lisette Gomes
Candidato Nr. 5

Parti 1: **RAIZ** su perspectivanan

RAIZ ta un movimiento politico diferente y innovativo, di base social democrata cu un vision progresivo cu ta brasa tecnologia como e yabi pa futuro. E vision di RAIZ ta e union di e comunidad como tambe den gobierno y no division, manera cu awendia ta e caso den e realidad politico. RAIZ kier traha cu "vakministers" cu ta capacita y experto den ehecion di maneho cu e abilidadnan strategico adecuado. E introduccion di un ministerio di Integridad y Innovacion ta un tema di prioridad pa RAIZ. Como obhetivo RAIZ kier hisa e nivel di participacion y activa e interes di nos ciudadanonan den politica, eleva e forma con ta hiba politica den parlamento, reenforza nos balor y normanan pa conhuntamente nos por crea un fundeshi democratico solido. Un fundeshi cu posibilidad y igualdad pa e futuro generacionnan di Aruba.





Enseñansa

- Introduci un sistema integral pa por pone ahustacionnan den practica; bin cu cambionan den e structura y maneho pa asina nos tur por comunica y traha hunto cu e mesun meta y vision
- Introduccion di un "Scol Amplio" (Brede School), un centro di enseñansa unda diferente sector ta traha hunto pa garantisa e formacion mas completo y di mihor calidad pa e mucha, educador (docente) y tambe e mayor
- Un sistema di enseñansa cu ta concentra su mes riba e individuo, manera "Enseñansa Na Miti" (Onderwijs Op Maat) unda e mucha lo beneficia di un formacion cu ta tene cuenta cu su talento, interes y abilidadnan
- Implementa un sistema di enseñansa cu ta cuadra cu y ta funciona efectivamente pa cu nos comunidad multilingual: Scol Multilingual
- Expande curiculo cu tecnologia y agricultura pa crea e di dos y di tres pilar economico, y tambe materianan manera deporte y arte como posibel opcionnan pa sigui studia
- Introduci un instancia independiente y proceduranan transparente pa determina y supervisa alocacion di fondonan (manera p.e. Fondo di Desaroyo) como tambe e introduccion di TEF (Tourism Education Fund) cu colaboracion di tur e stakeholders y NGOs cu ta forma parti di e sector di enseñansa
- Ingreso riba termino corto di "Enseñansa Di Siguiente Oportunidad" (Tweedekansonderwijs) unda e hobennan por studia pa un ofishi pa contribui pa asina integra positivamente den nos comunidad. E grupo di enfoka aki ta e supuesto "dropouts" cu hopi biaha ta haya un stempel y en principio no por integra mas den e sistema escolar, pero tampoco por haya trabou mas den e sector priva. Enseñansa Di Siguiente Oportunidad mester ofrece un chens real pa e grupo aki



Naturalesa y Medio Ambiente

- Establece e Derechonan di Naturalesa, "Rights of Nature". Naturalesa ta cargado independiente di derecho y e derechonan aki mester wordo garantisa na tur momento. Cada habitante di nos isla mester por referi na e derechonan aki den caso cu no cumpli cu nan of nan no wordo efectua. Ta absolutamente necesario pa proteha y maneha e derechonan aki pa asina nos naturalesa por haya su bos
- Dentro di e prome 100 dianan di gobernacion mester introduci un ROP (Ruimtelijke Ontwikkelingsplan) cu criterio. Cu otro palabra: mester bin un "bestemmingsplan" cu regulacionnan obligatorio pa den futuro por meramente wordo construi ora esaki ta acuerdo cu e destinacion di e tereno otorga. Banda di esaki mester regla pa ningun tereno protegi wordo otorga na grupo privilegia. Pa logra esaki e otorgamento di tereno erfpacht lo wordo conecta cu y investiga por medio di e ROP cu criterio y e ROP general
- Traha hunto cu NGOs y stakeholders local pa haya un mihor bista di e situacion ambiental actual riba nos isla, banda di e parke nacional, pa asina yega na e mihor plan di maneho sostenibel pa Aruba. Implementacion di vigilancia y maneho pa mes tanto paden cu pafo di e parke nacional ta un condicion
- Transforma Parke Nacional Arikok den Aruba National Park cu, banda di e area natural protegi, 16 otro areanan di naturalesa apunta na Aruba lo cay bou dje
- Definitivamente atende cu e problemanan di Parkietenbos y dumpnan ilegal cu medida y maneho por medio di multa y colaboracion di sector priva. E solucion cu RAIZ ta propone ta e introduccion di "incinerators". Pa metanan agricultural por produci compost di e desperdicio natural of "biogas" (Circular Economy)
- Introduccion di un "Marine Park" consecutivo (aaneengesloten) y e instalacion di vigilancia y maneho eficaz pa cu e regulacionnan ambiental vigente
- Transforma Bubali Plas, Spaans Lagoen y Isla di Oro den atraccionnan cu ta atrae ECO-turismo regula, impulsa pa sector priva, pero conforme reglanan estricto pa cu proteccion di naturalesa y interes publico

Seguridad

- Quick Scan independiente, integro, imparcial y profesional di e dos ultimo reorganisacionnan dentro di KPA (Korps Politie Aruba) pa por evalua den ki area mester bin mehoracion y den ki area por registra progreso
- Introduccion y simplificacion di metodonan di investigacion policial por medio di "bodycams", "carcams" y "CCTV" camera, mes tanto cu introduccion di "supervisornan particular"(buitengewone toezichthouders) y "ehecutornan" (handhavers) cu lo ehecuta y maneha e legislacion particular
- Investigacion imparcial y obhetivo bou di e poblacion di Aruba pa di e forma aki haya sa mas tocante e areanan cu falta atencion
- E ampliacion sistematico di KPA cu un total di 280 polis extra pa al fin y al cabo sostene e scarcedad existente
- E apuntacion permanente di areanan riscante (pa motibo di criminalidad) cu supervision intensifica pa di e modo aki hisa e chens pa detencion y cu esaki e seguridad. Personanan cu ta bende droga cu turista riba beach y ta causa disrupcion y inseguridad por wordo deteni na e manera aki. Inspeccion preventivo door di polis bou encargo di "Officier van Justitie" den un area riscante ta e metodo desea pa cu esaki



Social

- Implementa metodonan pa midi pobreza y bienestar den nos comunidad (segun e criterionan di UN y OECD) y tambe un "Social Progress Index"; criterionan cu ta determina y registra e necesidadnan basico di nos habitantenan
- Participacion di pensionadonan den un Think Tank pa por saca bentaha di nan experticio y alabes formalisa nan participacion den un "Multilayer Social Collaboration Platform" (MSCP). Esaki ta necesario pa combati e "braindrain" den nos comunidad
- Identifica e diferente gruponan den nos comunidad y analisa cada un di nan problemanan separa, p.e. relaciona cu e mucha, hoben y nos grandinan
- Segura cu tur pensionado por bira miembro di Wit Gele Kruis (WGK) pa asina por ricibi cuida medico te den na hogar. Un compensacion den e premia di AZV pa nos grandinan lo contribui na un cuida di calidad y pagabel pa e grupo menciona
- Defende e derechonan di e ser humano, incluyendo e derechonan di mucha, personanan incapacita, y parando firme pa e derecho di autodeterminacion y igualdad
- Lo pone atencion specifico na e analisis di e parti di maneho financiero y prestacion di servicio den e departamento di Asuntonan Social y di Famia/Hubentud cu introduccion di "Key Performance Indicators" (KPI) cu publico por monitor
- Un mihor control ariba e implementacion y maneho di e ley di "leerplicht" den nos enseñansa door di introduci un sistema online pa e melding. Unda cu mester lo traha riba e scarcedad di personal na buro leerplicht pa garantisa e control aki
- Introduci Meldcode pa violencia domestico y abuso di mucha
- E introduccion di un (kinder)ombudsman (Defensor Di Pueblo), unda ciudadanonan cu ta kere cu nan a wordo trata inhustamente door di gobierno por rekeri na dje



Economia

- Economia ta crece solamente por medio di sector priva, e ora duna sector priva tur loke e mester pa reactiva, reenforza y empuha nos economia pa e por florece
- E eliminacion di "redtape". Procesonan burocratico, innecesario y largo pa lanta companianan for di tera y activa nan, lo wordo obstaculisa. E gobierno por opera mas eficiente por medio di aplicacionnan tecnologico
- Stimula confiansa den sector publico por medio di participacion directo den programanan di gobierno
- Introduci "Tax Moratorium" pa e proximo 3 año; cu otro palabra, formanano nobo di impuesto no lo wordo introduci pa compensa e deficit riba e presupuesto di Pais Aruba
- Incentiva sector priva pa impulsa e di dos pilar economico basa riba "Knowledge Based Economy" (kenniseconomie) pa asina crea di Aruba e Silicon Beach di Caribe
- Introduci agricultura, cria y pesca como e di tres pilar economico
- Crea condicionnan di fiscal faborabel pa tur esnan cu kier participa na e di tres pilar economico basa riba e sector primario (agricultura, cria y pesca). E produccion di alimentonan local lo percura pa e comunidad por come saludabel y finalmente pa menos divisa sali for di Aruba
- Expande e "Facilitation Policy" crea na 2013 pa asina por trece bida bek tanto den mainstreet di San Nicolas como den Caya Gilberto François "Betico" Croes na Oranjestad. Stakeholders lo tuma "ownership" di e proceso unda e gobierno lo hunga e papel di facilitador
- Cumpli cu un acuerdo cu AirBnBs pa asina e "other accommodations" aki tambe contribui na e economia



Finansas Publico

- Entrega proposicion pa minimalisa e presupuesto di e ministerionan y pa aloca e fondonan na e beneficio di e pagamento di debenan di PPP, mirando cu esakinan mester cuminsa wordo paga entrante 2018
- Pa prome mester conduci un “kerntakenanalyse” di e ministerionan. Asina lo adkeri un bista ariba cua tarea por wordo laga den man di sector priva
- “Kerntakenanalyse” den departamentonan gubernamental pa facilita y impulsa un proyecto manera “Mergers & Acquisitions” den cooperacion cu sector priva. Asina lo crea oportunidad nobo pa sector priva y alabes fungi como medio pa baha gastonan di gobierno
- Reestablece confiansa di Hulanda den nos gobierno door di baha gastonan di gobierno na un forma structural y no incidental
- Pa cumpli cu e puntonan describi anteriormente, ta existi disciplina fiscal y integridad. Aruba na e forma aki lo yega na remarca pa refinancia su debe nacional via Hulanda na un interes reduci
- Cambio di e sistema di impuesto directo pa esun indirecto. Door di ingresa y implementa e ABB (Algemene Bestedings Belasting). Esaki ta cla ta warda desde 2014 y falta solamente aprobacion di Parlamento
- Pa evita destruccion di capital innecesario cu tur e consecuencianan cu esaki ta trece, e gobierno mester haya autorisacion di Parlamento pa por anula proyectonan grandi y costoso



Bon Gobernacion

- Introduci un ministerio di Integridad y Innovacion. E cantidad di ministerio mester keda na un maximo di 7 minister. Esakinan por solamente ta mas ora cu permanece den e presupuesto fiho di e total di 7 ministerio
- Pa RAIZ ora ta papia di Bon Gobernacion, nos ta papia di "Open Data"
- Automatiza y digitaliza nos aparato gubernamental
- Transparencia; tur documento di gobierno ta di e pueblo, pueblo/companionan tin derecho pa haya sa kico ta pasa cu nan placa di impuesto, den un forma corecto y na tempo, respetando si e privacidad di cada persona y/of compania
- Adapta leyman pa no permiti ministernan haya acceso indefini na tur fondo riba nan presupuesto of riba companianan di estado
- Den espera riba cambionan di ley, e ministerio di Integridad lo trata tur decision di ministernan y Ministerraad a base di criteria di "rechtmatigheid" y "doelmatigheid"
- Inclui pueblo den decisionnan door di haci uzo di tecnologia y "crowdsourcing"
- Introduci un Centraal Plan Bureau (CPB) pa di e forma aki construi basa riba mihor data y estadistica cu ta necesario pa calcula di antemano propositonan di gobierno
- Independisa CBS (Centraal Bureau van Statistiek) cu como meta e adkision mas lihe di data y e maneho mas eficiente di data
- Transforma nos gobierno den un "E-government" pa asina optimalisa transparencia, hisa eficiencia y minimalisa e posibilidad pa corrupcion por tuma lugar
- Introduci KPIs (Key Performance Indicators) den tur instancia di gobierno cu mester crea e condicionnan pa por examina "doelmatigheid" y "rechtmatigheid" di e gobierno su procedimentonan
- Reestablece confiansa di Hulanda door di reintroduci y reenforza e participacion di Algemene Rekenkamer Aruba, CAD (Centrale Accountantsdienst), Raad van Advies y SER (Sociaal Economische Raad) den formacion di decisionnan di gobierno, como tambe introduccion di un Begrotingskamer



Turismo

- Legislacion apropiada cu regla y regulacionnan pa "other accommodations" pa di e forma aki garantiza un funcion di mercado husto y cu "fair contributions" (contribucion husto) den nos sistema di impuesto
- Modificacion di e nivel di "import duties" pa hotelnan cu ta inverti riba \$10,000 pa camber riba muebles
- Claridad riba – y revision di alocacion di – e fondonan cu ta bin di e "Environmental Levy"; impuesto cu ta wordo cobra for di industria di turismo pa sostene nos medio ambiente
- Libera ATA for di metemento di ministernan, ATA mester enfoca ariba turismo y no fungi como banco pa tur sorto di proyecto personal chikito pa algun minister. Gobierno mester controla rendimiento via Key Performance Indicators (KPIs), pero laga e trabou di turismo den man di nos expertonan den e area
- Revisa reparticion di e fondonan publico (p.e. logeerbelasting) cu a wordo traspasa pa ATA controla. Revisa e distribucion entre ATA, TPEF (Tourism Product Enhancement Fund), Tourism Education Fund, y PPP-fund (pa gastonan di e proyectonan PPP cu realmente ta pertenece na "product enhancement")
- Amplia participacion di sector hotelero y sector priva den e "board" y decisionnan di ATA y TPEF. Exigi KPI mas concreto y frecuente pa determina ROI (Return on Investment) di e fondonan aki
- Provee Aruba Hotel & Security Foundation (AH&SF) cu fondo pa ta eficiente y garantiza e mihor seguridad den e areanan turistico
- Elimina "beach precario" (strandvergoeding) y dialoga cu e participantenan den sector priva di e industria aki pa introduci un "clean and open beach policy" (beach limpi y habri pa publico)
- Introduccion di "Nature Protection Levy" cu lo ser paga pa turistanan y di cual e fondonan lo ser maneha pa Aruba National Park
- Hotel y Condominium Moratorium pa asina haci un "carrying capacity study" pa nos por crea un Aruba sostenibel di berdad
- Revisa hunto cu ATA y expertonan internacional e mercadeo na destinacionnan manera p.e. USA y Europa, y alabes e "cost-benefit analysis" di esaki pa midi si e inversionnan ta conveniente y eficiente
- E realisacion di presencia di Polis den areanan turistico den tur distrito di Aruba
- "Community Policing" (polis pa tur barrio) y "Promoting Positive Youth Integration" (PPYI= Integracion Positivo di Hubentud) / Jeugd Politie
- "Coast Surveillance" (Guarda Nos Costa) y controladonan di permiso (Guarda Nos Costa Plus)



Salubridad Publico

- Atencion integral pa cu salud: conscientisa/educa, prevencion, diagnostica, trata/cura, rehabilita
- Crea un “Eerstelijnszorg” cu lo evita “wachttijd” di especialista y lo reduci gasto di SVB. Akinan mester integra e “basisartsnan” (duna nan un chens pa nan por realiza nan profesion) pa asina por yuda reduci listanan di espera. “Basisartsen” den e regio ta capaz y suficiente ekipa pa trata casonan cu clasificacion abou (griep, bronchitis, control di malesa cronico e.o.) Esaki ta alivia e problematica di listanan di espera largo y ta reduci e presion riba e doctornan di cas
- Centralisa e sistema di registracion di tur e docternan na Aruba pa asina docternan y AZV por comparti informacion actualisa di e pashent
- Crea un standard pa mediconan cu a studia den region por wordo cualifica diferente na e sistema actual conoci como e sistema di BIG; mediconan kier pa e mentalidad di “nos contra nan” den e sector di cuida medico para y wordo reemplaza cu protocolnan di colaboracion
- Conscientisa tur usuario di AZV ariba e gastonan halto di remedi pa asina crea un bista mas realistico y responsabel pa cu e gastonan halto cu tur hende mester yuda carga y baha
- Mehora e curriculum di EPI Welzijn, specialmente den e ramo di “verpleging y ondersteuning” pa duna nos muchanan mas oportunidad pa traha den e sector di salubridad y pa nan ta mihor equipa. Banda di esaki brinda oportunidad pa “nascholing” di tanto e trahadornan nobo como esnan trahando pa tempo mas largo den e sector aki
- Incorpora cuida special (bijzondere ziektekosten), manera p.e. cuida di nos grandinan, cuida di hendenan cu un incapacidad y pa salud mental, bou di AZV cu un premia separa pa e cuida aki (cu reduccion di impuesto) mescos cu na Hulanda, Corsou y Sint Maarten
- RAIZ lo sondea conhuntamente cu sector priva y otro stakeholders, programanan pa stimula alimentacion saludabel den nos comunidad. E prijs di productonan fresco y saludabel (fruta y berdura) mester keda pagabel door di desconsheha consumo di “junk food” y subi e prijs di e productonan aki, alabes door di promove cuminda saludabel na tur scol rond di Aruba, y door di expande e iniciativa existente di “Gezonde School”



Email: info@raizaruba.com

Facebook: [@raizdiaruba](#) Instagram: [@raizaruba](#)

Website: www.raizaruba.com